

Jut

Nægkiariien sə rani mə nəfe i nəkukuə

Jut rəmwhen ia Jemes, in piəvi Iesu. In rirai nəkukuə i mægkiari ia nahatən eikuə me səməme Pita ramægkiari ia nirəha ia nəkukuə səvənhi sə ro kəru irə. Jut in mwi rini mə nakalasia me tuhaməkeikei mhəsiari kamo nahatən eikuə me nəha həkoui irapw irəha ia suatuk atukwatukw. Nahatən eikuə me nəha haməni mə Iesu ripko mhə in Tini Kumwesən. Irəha kamhəiri pen nərmama ia noien ərəha. Jut rini mə Kumwesən trərpwin noien ərəha səvəi nahatən eikuə me mouraha irəha. Rəmwhen in rinərpwin raka noien ərəha səvəi nagelo ərəha me mine nərmama ərəha me ia nəpwin səvəi Oltestamen.

Nægkiariien sə rakupwən

¹ *Iou Jut. Iou iərmama riti sə iakamo tukwini nari m Iesu Kristo. Piak nə Jemes. Iakamrai nəkukuə i rauvehe tukumiaha nərmama me i Tata Kumwesən rinokeikei kimiaha, məkwein ia kimiaha. Iesu Kristo in ramətui amasan tukumiaha. ² *Pwəh Kumwesən trəriari pehe napiien, nəmərinuien, mine nokeikeiien m kimiaha. Pwəh irəhar harasori mwi tukumiaha.

Nəkur ərəha me mine nərpwinien sə Kumwesən tro mənraha

³ *Piak keikei me. Fwe kupwən iakokeikei pik

* **1:1:** Mat 13:55 * **1:2:** 2Tes 1:2 * **1:3:** 1Tim 1:18

mə takrai nəkukuə i m kɪmiaha, məgkiari ia suatuk səkɪtaha pəri Kumwesən rauvehimiru kɪtaha irə. Mətə təkwtəkwwuni iakregi mə takaməkeikei mirai nəgkiariien i, mini pehe tukumiaha mə tihaməkeikei mhousari mhəkwtəmhiri əknekɪn nəgkiariien i kɪtaha samahatətə irə. In i nəgkiariien pərhiən sə Kumwesən rɪməuvei pen m nərmama me səvənhi, nənə trɪpkuvei pen mhə mwi ia nəpɪn riti mwi. ⁴ *Iakani iamɪnhi irə ti nəri nə mə nərmama nepwɪn həuvəuvehe afafa raka ia nousəsɪmwɪnien səkɪmiaha. Irəha nəkur ərəha me. Kamhəkoui namasanien i Kumwesən rauvehimiru kɪtaha irə ruvehe mo nari riti sə raməsəni irəha həukurən noien nəfe nəghɪn nətərigien ərəha səvənraha rokeikei. Irəha kamhəuvsini təkutanraha m Iesu Kristo, mətə in əpa nəha Iəmə asori mɪne Iərɪmənu səkɪtaha. Kuvərai pen raka tui ia Nəkukuə Ikinan nəfe nərpwɪnien Kumwesən truvei pen mɪnraha.

⁵ *Iakuə tako rerɪmiaha rɪrhi nari m nari me nepwɪn səməme hiəuvəkurən raka. Fwe tui Iərɪmənu rɪməuvehimiru nəkur Isrel, miri raka irəha ia tənə Ijip, mətə kurirə rousi əpune irəha nəha səməme həpkɪni mhə nɪpərhiənien ia nəgkiariien səvənhi. ⁶ *Nənə rerɪmiaha trɪrhi ro nagelo me nəha fwe kupwən səməme həpkəkwtəmhiri mhə nasoriien sə kauvei pen mɪnraha, mətə haraka irə, mhəpwəh kwopun atukwatukw səvənraha. Kumwesən rɪnərihi irəha ia jen me səməme tuhəpkɪwən mhə, məmri pen irəha fwe inhəripw ia kwopun rɪpitəv ikin. Tuhamarə ikin meste nəpɪn asori sə Kumwesən

* **1:4:** Kal 2:4, 2Tes 2:1
2Tes 2:4,9

* **1:5:** 2Tes 1:12, 1Kor 10:5

* **1:6:**

trærpwîn noien ərəha irə. ⁷ *Nənə tihəpwəh nenouenouien taon mi nəha Sotom mine Komora mine rukwənu me ipaka fwe kupwən. Napw rahi pam nərmana me ikin ti nəri nə mə nərman mine nīpran kamhəiri əpnəpen irəha me, nərman me kamhəiri atukw a irəha me. Nərmana me nəha həmwən ia nahatən penien riti sə ramahatən pen nərmana səməme Kumwesən trærpwîn noien ərəha me səvənraha ia napw sə rauək rerin.

⁸ *Ia noien me nəha rəmwən a mwi nərmana me i iakaməgkiari ia nirəha kamhəkuriə nəməkrahien me səvənraha, mamho noien əmkemik ia nīpwrənraha, mamhəni mə Iərimənu in rīpkasori mhə ia nirəha, nənə mamhəni ərəha mwi nagelo me fwe ia neiai. ⁹ *Mətə Mikael i, agelo sə rasori ia nagelo me pam, in rīpkə mhə iamihni. Fwe kupwən, nəpīn krouəvisə irau Setan mə sin truvehi nīpwrai Moses minimwi, in rīpkuvehi utə mhə in mini nəgkiariien ərəha riti muəsi Setan i. Mətə in rini a mə, “Pwəh Iərimənu trinise ik.” ¹⁰ *Mətə nərmana me i, trini minuə hərəirei nīpwrai nari riti, tuhaməkeikei mhəni ərəha. Irəha həmwən ia nəri əpmin me səvənraha nətərigien riwən. Hamo a nəfe narimnari me rerinraha rokeikei, nənə noien nəha ramouraha a irəha.

¹¹ *Aueh, trərəha anan ti nirəha! Irəha kamhesi pen suatuk nə Ken* rinesi pen. Irəha hokeikei pik mane mamhəmwei ia nərəhien nəha Palam*

* **1:7:** Jen 19:1-25, 2Tes 2:6,10 * **1:8:** 2Tes 2:10 * **1:9:** Dan

10:13,21, Dan 12:1, 2Tes 2:11, Rev 12:7, Sek 3:2 * **1:10:** 2Tes 2:12

* **1:11:** 1Jon 3:12, 2Tes 2:15, Nam 16:1-35 * **1:11:** Jen 4:3-8

* **1:11:** Nam 31:16

rino. Irəha atukw a kamhouraha irəha ti nəri nə mə kamhərer mamhəni ərəha Kumwesən rəmwhen ia Kora rino.

12 *Irəha həmwhen ia nīpitəvpitəvien me ia kurkwamiaha. Nəpīn hiamousəsimwīn kīmiaha me ia nokeikeien, mamhani pəri nari, irəha həpkehekīr mhə, mamhətərig atukw a ti nirəha. Irəha həmwhen ia nəpuə me nīmətagi rameikwi pehe irəha, mətə nesən riwən. Irəha həmwhen ia nei me həpkukuə mhə ia nəpīn sə nei raukuə irə. Ro iamīnhi irə tukeivi utə irəha irəha ru-enhīnraha me nənə tuhemhə anan. 13 *Irəha həmwhen ia peiau peiau asori me ia təsi. Noien səvəi naurisien səvənraha rameiai rəmwhen ia nisəkwai təsi. Irəha həmwhen ia kəməhau səməme kamhəivə. Kumwesən rīnəpnəpenə raka kwopun pitəv anan riti səvənraha tuharə rerīn ikīn.

14 *Inok, iərmama sə ro sefen ruku pen ia kwənəkwws səvəi Atam, rini irapw nəgkiariien sə Kumwesən ruvei pen min, mukupwən məgkiari ia nərmama me i, mīni mə,
“Hətə ro! Iərimənu rauvehe irəha nagelo ikinan me səvənhi irəha taosen m taosen.

15 In rauvehe mə trərpwīn noien ərəha səvəi nərmama me pam.

Nəfe noien ərəha me irəha hənə ia suatuk sə rəpwəh nəmwhenien ia nənimen,
uə nəfe nəgkiariien skai me nəkur ərəha me səməme kamho noien ərəha həməni irə,
in tro pui pam, muvei pen nərpwīnien mīnraha.”

16 *Nərmama me i kamho nəgkiariien me ti nīni

* 1:12: 2Tes 2:13,17, Esik 34:8 * 1:13: 2Tes 2:17, Aes 57:20

* 1:14: Jen 5:21-24, Dut 33:2, Mat 25:31 * 1:16: 2Pit 2:10,18

ərəhaien nari. Ko irəha həpkafafa mhə. Kamhesi pen nəfe noien ərəha nətərigien səvənraha rokeikei. Kamhəfiəutə atukw a ia nirəha me. Kamhəgnəgini nərmama, mətə ho a mə nərmama tuhasitu ia nirəha.

Rerimiahaha tramrhi nəgkariien səvəi aposol me

¹⁷ *Mətə piak keikei me, rerimiahaha traməkeikei mīrhi nəfe aposol me səvəi Iesu Kristo Iərimənu səkitaha həuvəni raka fwe kupwən mə trier irapw.

¹⁸ *Həməni pehe tukumiahaha i mə, “Tramevən ipaka ti nəpīn sampam nərmama nepwīn tuhəuvehe. Irəha tuharis ia kimiahaha, mamhesi pen nəfe noien ərəha nətərigien səvənraha rokeikei, mamho narimnari me həpwəh nəmwhenien ia nəmri Kumwesən.”

¹⁹ *Nərmama me i tuhəvisə mheitehi kusen səkimiahaha. Irəha nərmama me səvəi tīprənə i. Nənīmwin Ikinan riwən ia nirəha.

²⁰ *Mətə piak keikei me, kimiahaha tihaməkeikei mhərpwi əknekīn kimiahaha me, mho nahatətəien səkimiahaha riskai. Nahatətəien nəha ruku pen ti Kumwesən, nənə ro ikinan i. Nəpīn me tihaməkeikei mhəfwaki ia niskaiien səvəi Nənīmwin Ikinan, ²¹ mhəpwəh narakaien ia nokeikeiien səvəi Kumwesən. Tiho iamīnhi mamheitenhi Iesu Kristo Iərimənu səkitaha. In truvehe mapi kimiahaha, nənə muvei pehe nīmīruien rerin m kimiahaha.

²² Nərmama səməme nahatətəien səvənraha rīpkiskai mhə, kimiahaha tihaməkeikei mhəpī irəha.

* **1:17:** 2Tes 3:2 * **1:18:** 2Tes 3:3 * **1:19:** 1Kor 2:14 * **1:20:** Kol 2:7, 1Tes 5:11

23 *Nərmama səməmə kamho noien ərəha me, tihəməkeikei mhəuvehi raka irəha ia noien ərəha me səvənraha. Tihəuvehimiru irəha pwəh həpwəh nevēnien fwe ia napw. Nərmama nepwɪn mwi tihəməkeikei mhapi irəha, mhehekir mwi irəha. Nəri auər a mə tinari səvənraha, mətə tihəhekir i, mhəpwəh nɪrapien, ti nəri nə mə rəmkemik ia nərəhaien səvənraha.

Nəgkariien sampam

24 *Kumwesən in əpa trəkwtəmhiri kimiaha mə tihəpwəh nımweiien. In əpa tro hiəuvən mhərer ia nənimen ia kwopun səvənhi sə raməhiapw, kimiaha tihatukwatukw pam, mamhagien asori.

25 *Kumwesən i sə rauvehimiru kitaha ia nəghi Iesu Kristo İərimənu səkitaha in əpa Kumwesən. Pwəh nəgnəginiien, mine nərimənuien, mine niskaiien, mine nasoriien həuvən əpa tukwe fwe tui nəpɪn tiprənə ramiwən ihi, ipwet mine, mamevən meste nuk nuk me. Ouəh, pwəh ro iamɪnhi.

* **1:23:** Amos 4:11, Sek 3:2, Rev 3:4

* **1:24:** Fil 1:10, 2Tes 3:14

* **1:25:** Rom 16:27, 2Tes 3:18

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416